

四庫全書

集部

欽定四庫全書

集部

弇州續稿卷三

四

詳校官編修_臣潘庭筠

中書_臣劉源溥覆勘

總校官進士_臣楊懋珩

校對官檢討_臣郭寅

謄錄監生_臣許祖懷

欽定四庫全書

弇州續稿卷三

明 王世貞 撰

詩部

四言古詩

瑞禾詩

瑞禾美司馬屠氏也忠而見絀寬慈靖終爰有
嘉禾產自寔封是故美之

蜿若游龍矯若歸鴻入自巽方鍾為幽宮無叢萊資無
蔓迷陽芄芃嘉禾產此高岡此燥而岡彼濕而杭惡乎
宜乎天定發祥在昔聖臣誠不見明皇靈動變郊迎返
風同穎之禾唐伯薦王王不自有以歸姬公唯子之昔
經營四方日篤不懈拱翼世皇角巾東歸口不挂功含
弘樹惇惠此家邦是故大歸上啓帝聰我聞寸田可蓄
以耕培爾孫枝豈惟子躬是穠是萃其滋必豐請用薦
嘗標此蓋庸

燕燕詩

燕燕于庭其掠也適人以為樂我知其憂惟壘之茸而
翼子是謀 魚魚在藻其泳也逸我知其憂人以為適
惟餌之芳而口腹是迫 人樂其憂我則知之出與利
投劇與名偕或蕃子孫或壽考惟祺 我憂其樂人安
能度利令智昏名令實削或子孫我役或壽考我縛
憂樂之來匪我敢掄不自天亦不自人澹兮寂兮以
藻厥真

右燕燕五章章六句

帝省禮門頌張母也母寡而貞底孺於成行年七

十祝之使養祿也

帝省禮門爰毓之祥俾女於宋而妃於張宜爾宗祧宜
爾舅璋 帝寧不勤恤而張是痛有鳳九苞殪於天衢
琢之廟之試以百罹 莫苦匪荼視汝則薺莫畏匪醜
視汝則醴先君之思以勗孺子 伯孺而穀先君所衷
夜如何其誦聲隆隆惟此誦聲若自杼中 戰戰粟粟

以保七裘雖則七裘皎若一日祝之釐之不家食吉

右帝省五章章六句

樸庵詩為顧生作

子有精廬有巢是師結繩為樞剪茅而茨太樸不琢以
還吾天雖有輸倭巧曷施焉太樸不飾以保吾素雖有
五采曷如其故蛾眉自妍混沌畏之身既隱矣安用文
為子庵曰樸請對以默詩不云乎不大聲色

貞以沈魄荷蒙真師上援聖祖大士慈念拯拔方

圖旦夕供奉而喜知識殷子以補陀落迦山全
像見贈玆好端嚴種種具足感慰之深聊述四

言一章為謝

昔我大士無央劫前從音入道超諦妙圓上等佛慈下
同衆虔三十二應一一現全爍迦羅首八萬四千清淨
寶目母陀羅臂毛孔世界亦復如是普度有情廣施無
畏爰有巧工陶甃為器補陀落迦色肖咸備如佛世尊
說法忉利旃檀表憶妙好無異惟貞小子下土磯臣賴

我慈祖賜拔沈淪甫事薰修忽徵勝因悅扶沈鸞中現
金輪始悟寸衷欲仁得仁貽者商京結善識根靈鷲之
顛舍妄歸真

以雙玉杯假敬美暫留趙吳興所書蓮花經成此
漢有雙璜以為雙筍其劇若縷哲澤而古侍女于行酌
彼清醑吸醇暢蘇如覲伯雅汝奉蓮經佛所秘語吳興
筆之則羣玉府我幡我誦如奉慈父紉女緗縹又似覲
女比及三載各復其所由證入悟筌蹄是舍而況茲器

視等直土吾言亦贊一笑首頰

世貞舊嘗供奉三教聖容朝夕參禮近慕鍾呂七

真之事方擬募工圖寫而信陽王太史忽以元

人名蹟見遺精彩煥發驚感之餘聊成短述以

謝

惟古先生無上法言憫衆為卑超萬為尊我祖文宣師

資玄元因機現用派別流奔迷者相讐悟則一源我儀

圖之在三誼存玄元之秘誰歟扶焉東華震器雲房仍

孫呂創大還混迹乾坤劉辭貴鄉不娶嫁婚是皆入室
夫豈窺藩默開重陽遂探化原匪禪而禪高研道園法
子法從上為詰昆七葉金蓮恍湧朝曦疇萃一圖如百
寶盆悟大叅同闢不二門玉局侍臣遙種慧根用彼昭
昭啓余昏昏何以酬之至仁無恩

應襄王教題木石居

遠游不御黼衮不加有桷不刻有階不華坐倚磐石行
倚喬柯其去野人能復幾何一聞善言沛若江河慕彼

側微削此魏莪仁遠乎哉欲之即至舜何人哉為之即
是

應襄王教題觀園榭

陽春被天冠此王圻吾王不游民何以怡循覽靈園亦
有靈臺灌木崇霄祥卉覆階白雲英英黃鳥喈喈育物
對時靡棕不諧陋彼田齊周文是儀

張伯子五十壽言

昔在世皇肅外臺綱誰其蓋臣乃有二張等彼二荀叔

慈慈明慈明內潤智以仁藏積厚而鍾伯子發祥惟我
伯子雋聲英英立破萬卷躡百氏場吐為藝文陸離沈
洋中權所指鋒孰敢當薄游賢關如錐處囊天恡搏扶
疇適雄飛斂爾壯心杜爾德機不順以施日勝而肥懷
珠川媚蘊玉山輝君曰寧爾容彭所希黃金為餌同類
為妃駭虬御鸞翱翔九圍人有恒言五十知非君知其
非大雄是皈離照中天萬焱息輝誰縛誰解何順何違
六轡在御惟汝指麾不慕獨覺寧希小乘不貪轉輪何

況小榮著為微言撇捺縱橫蕩乎漆園又似淨名其子和之玉振金聲獨立須彌頰挹太清怒馬脂車如襲百蠅封人之祝如一蠅鳴我有半偈乃駐君聽四十九年無法可稱杜口毘邪息心化城大家團藥共證無生

石禪齋詩

友人卓徵甫作高齋曰石禪居士欲輦天目山柴煨此石作灰不若以數語解之

以禪呼石石不點頭指石為禪禪笑不休禪亦強名況

石贅疣石在汝臆滯汝西游曷不推碎置之東流自在
無礙蕩蕩悠悠汝既堅頑如石水投取指譬月求劍刻
舟石言則妖我何曉曉飛霰洪爐才點即消

中泠館詩

天一之精滙為天潢播於人間洵廣且長九曲曰河九
派曰江止水之潘中泠最良武昌王孫鑿井其城濯彼
心魄導之清澄爰蔭崇館爰飾嘉名何必金山始為中
泠惟此中泠與阿耨水長安帝城乃有二異時無萬迴

且鮮太尉沈冥其中曷識真味

五言古

二友篇

吾取友於天下李于鱗以文字實伯仲焉楊仲芳
之以節義相切劘亦庶幾也不幸中道棄我今者賴
天之靈元馭拔我於雕蟲而進之太上刮濯而就之
我友也實我兄也敬美匡我保我弟也實我友也
元馭尚矣收敬美於出處之後夫誰能以僭譏我

王宗伯錫爵

太原吾閨彥弱小負靈植三館抗清標八座迴正色步
武鼎鉉間棄之如遺跡榮名冠寰宇絳紳所趨翼望望
若將浼空空類無識五十孺子慕扳哀變原栢伊余麻
中蒲謬充他山石晚途乍折節感此三不惑芟荷良可
依薇蕨足充食荆玉竟夕輝恐為世工得

吾弟學憲世懋

吾弟一世才孝友復天性感慨家難餘需徐傲時聘興

文良鬱跂流翰亦彪炳熟復循吏篇所莅必響應人誦
關西學家傳豫章政一戢穠豔規夷然遂無競稍闡墳
素業頗寄農圃興所惠余有身衰來遂為病起色待爾
發肉枯寧天幸竊從毛君教相將訪真境

重紀五子篇

余昔為五子篇則濟南李攀龍吳興徐中行南
海梁有譽武昌吳國倫廣陵宗臣其人也已而
其友稍益則為後五子篇豫章余曰德歛汪道

昆蒲折魏裳銅梁張佳胤汝寧張九一其人也
蓋三十年而同矍圃之觀去已半矣今其存者
位雖有顯塞而名業俱暢志行無變蓋懽然欣
然之感一時集焉故為五章以追志之

汪司馬道昆

司馬誠國器豁落不庸庸兼濟文武資南北倚折衝愛
弟若一身憐才見春風五十佐元樞猶在塞與通高卧
黃山表健筆吐如虹珠璣走荒裔金石耀幽宮如發汲

郡藏孰當檀左鋒自余友太原忍然畏雕虫濟南貴葉
玉物論時不同所以千秋葉唾手歸宗工

吳叅政國倫

昔我先司馬列棘遊楚士于時獨明卿哀然拔其萃拓
洛厭時趣縱橫富篇製已窺正始格復探作者意失鵠
必反求貫革有餘銳頗餘東方謹不作公孫媚吏道亦
自工時違巧相避二始稍見收三斥竟成躓桃李傾驕
日幽蘭自憔悴開徑拱口田賣文成活計却問諸少年

疇能一兼詣

余憲副曰德

德甫宦不達銜饑卧西山散髮聽樵歌輕舸弄潺湲寧
無臨川履不踏城市間舉世稱高節吾獨歎微言昔聞
雙井徒謁蹶趨險艱旦夕費雕鏤不救巖石頑解曾一
決之濁流遂汎瀾左蠡稍自清匡廬出孱顏遂令洪都
瑟疏越表三歎正始豈必多濫觴良亦難

張御史大夫佳脍

岷峨孕才秀銅梁嗣臨邛昔托藝苑盟均年如弟兄豈
無竹林雋坦陀讓山公處則若淵停沛則九有豐五領
開府節三奏保障功談笑杯俎間立除肘腋克既表文
士用復解書生窮追鋒一召入立拜留侯封黔黎既羶
悅翰管亦景從而我獨何為疊疊稱赤松

張中丞九一

胎簪昔中折桐栢亦涓涓張生一振之矯矯遂無前平
原稱盜驪霜夜拭龍淵昔與宗生角推鋒互瑕堅一矢

銀潢漏再矢月脇穿雋聲絳灌耳淪落二十年晚遂始
見收改服事戎旃密餌間閔氏飛書降右賢山甫城朔
方吉甫頌其賢自非如椽筆疇能勒燕然

末五子篇

余老矣蝸處一穴不能復出友天下士而乃有
五子者儼然而以文事交於我則余有深寄焉
自此余不復操觚管矣夫汝師者嚮固及之然
而未竟厥詣也是以不妨重出云

趙太史用賢

天地有完氣汝師乃鍾之苦心為人綱九鼎係一絲杜

門從耕牧欲然不矜持順風禮空同再拜稱天師

謂曇陽子

也偃仰思立言餘工猶下帷百子雜毫端弭節為我馳

竊窺中興象在起八代衰

李叅政維禎

本寧名家後況復產郢里高倡白雪言誰能不披靡弱
冠白虎帷授簡平津郎絳灌中自疑素伏能無詆遷地

邇長沙移官逾二始一秉西京鐸洋洋復盈耳賜環夫
豈難懷璧不吾以

屠儀部隆

屠郎天下才著作日不休如叩海人居一券萬金酬錯
落多夜光魚目非所憂仰窺二都闕恍與六代游塵尾
有真銓清言凌素秋芥彼區中士釋我薄書郵割榮差
為力挫名方乃優

魏博士允中

昔余游天雄毫翰殊寂寞懋權起諸生朗若雞羣鶴甫
薦博士言遽申風雅托歌鹿冠神京儀鶴瑞阿閣逶迤
霄漢表猶能念丘壑片語垂光景千秋縱揮霍季君何
沈沈長君正諤諤

胡先輩應麟

胡郎天挺豪弱齡富篇咏突窺濟南室擺脫信陽境高
嶺秀繁條何所不輝映順風揚妙音疇能不傾聽沈思
窮正變廣心饒比興牛耳終自歸蛾眉竟誰並已覩千

佻翔徒勞衆口競

四十詠

諸賢操觚而與余交遠者垂三紀邇者將十年
不必一一同調而臭味則畧等矣屈指得四十
人人各數語以志區區大約德均以年才均以
行非有所軒輊也

皇甫僉事訪

安定饒世業八龍得其半叔氏獨挺出興辭恣璀璨齊

全宋文卷之三
卷三
梁大篇錯錢劉小言冠時嗟安仁拙終籍長卿翫歸然
魯靈光拉羅非所歎

莫方伯如忠

俯仰子墨林所覩無長者莫公豈不文宛若田父社有
抱不自璧雖完詎為瓦饑來翫清泌衡門亦瀟灑時藻
汰欲空居然餘大雅

許長史邦才

殿卿若春風所拂無不柔酒德日頽然禪語聊厭酬耕

我謹陰田愛此鵲湖幽楚璞不自貴良工琢為璆取友
何必多一李成千秋

周山人天球

碩果寒不食詞林見前輩典刑足禦俗文彩亦被世一
工臨池業碑板光四裔義取無虛月筆耕盡良歲却顧
迂叟謀寂寞身後事

沈山人明臣

嘉則少負奇從事車騎幕俠氣貫秋旻藻詞麗朝履千

人廢喑鳴百氏從揮霍屠子一代盟朱生九原諾族貴
文亦就是以不落莫

王太史祖嫡

太史瑚璉姿葆真鏟光相與余一談執瀟灑神俱王傾
蓋豈必深慨焉成辨謗蘊藉叔度流縱橫東京上疏草
就磨滅苦心將誰向

劉僉事鳳

西京祀以遠浸淫成六季揚馬雖沈淪餘波尚綺麗子

威負奇者冥搜復傍綴遂令一代業燦若雲錦製所虞
白鳳凰飄瞥毫端逝

張先輩鳳翼

伯起初藝成白晢美少年一芬墨池藻衆工歸我妍薄
游燕昭臺興盡剗溪船自謂千秋業不假公車傳晨著
潛夫論夕奏鍾期絃

朱王孫多憤

天潢無濁流洪都饒國琛宗良雖晚成力窺作者林窮

搜自冥合有造必苦心飛書漸寂茂神交豈在今垂當
忘言際聊以表知音

顧山人孟林

至人不皮相文士不滅跡山甫一荒傖而乃癯山澤雖
謝伯鸞春尚輸柴桑獲日暮負薪歸商歌中金石猶有
身後名時時一沾臆

殷進士都

無美攻六藝乃在卅角時濩落四十年識者亦為疑俠

氣標肺腑壯心見須彌跌宕詞翰林煜煜吐色絲異時
平津拜不言公車遲

穆考功文熙

穆君義俠人強被名教用有才思挽俗信已必違衆幡
然悟此身實為千秋重力鞭北地足冀追少陵韜千里
在毫髮遜心敢忘諷

劉先輩黃裳

諸賢世皇朝重慶冠時選俊鶚搏諫垣彩駟躡文苑餘

志屬象賢鳳毛何宛宛賦海幾玄虛談天類鄒衍襜褕
故未報托寄良非淺

張太學獻翼

吾憐張幼于天才尤卓絕十六游龍門

謂文氏也

遂富長者

輟結客聊自媮治生非所屑詩登上卿席名綴下士列
疇不和朱絃誰歟賞白雪

王太學穉登

百谷命世才興文自綺歲既饒江氏錦時新許公製款

段羣蹠蹠驂騮瞥先逝月旦搖吻間風烟染毫際詎學
空門子無諍入三昧

王山人叔承

詞苑足膚立王郎獨竒骨有吐必匠心徃徃自天發以
此振俠聲所友必賢傑貴者雖自貴視之同毛髮一醉
即陶然相將向超忽

周選部弘禴

周生應公車故多天人畧駘蕩一世名匠心成述作上

書欲有陳雅非絳灌樂鼓雪停楚雲執蘭芬叢薄毋聽
漁父談清時寧濩落

沈尚璽思孝

百年一羅生弱絲係九鼎繼者四五人純甫尤耿耿出
日瘴霧披清霜毒炎冷賜環豈不榮栖遲還定省三復
行戍篇令人貴五嶺

魏考功允貞

考功昔在臺屬當鼎革際再疏輕逆鱗必取第一義旋

返長沙謫小寬絳灌議東省一冰壺清光鑠羣媚穆如
新詩來知君不遐棄

喻杭州均

邦相強項人焉能事言路流落湘楚間深衷托騷賦循
吏足自寬文苑雅相慕登我弇山堂握手遂成故嫖母
猶在宮母使蛾眉妬

鄒黃州迪光

吾愛鄒齊安才行一何姣有造必開先微言窮窈眇春

至赤壁青霜落大江
小人云江山助所得
殊不少却笑
眉山公晚來未了了

余明府翔

陶令謝彭澤余令辭全椒
俱言以酒廢無乃為折腰陶
影不出山余跡不入里
當其傀儡時千載如一軌
新詩亦自佳能諧世人耳

張將軍元凱

時平介冑間風雅亦一詣
我憐張將軍擺脫謝流輩
傍

宋元嘉風不踏會昌地捲白氣若麤殺青心自細試問
錦鷓鷯已從酒家質

張京兆鳴鳳

羽王拙宦人沈精托文執頗修鄙下言突過景龍際沾
沾意自伐汲汲取相媚十載七徙官青衫轉成敝徒令
五彩翰零落偏荒裔

邢侍御伺

齊風故憍志子愿乃温然書探會稽室文匠東京前抗

志凌九霄降體納百川伊余安時汰君子衷所憐邁若
飲醇醪睽若思嬋娟

鄒吏部觀光

吏部弱冠年其名已張楚籍籍尚書郎小遂厭珪組晞
髮朱鳥顛探珠驪龍府巖壑與廊廟但悟即千古毋泥
五君篇谿刻徒自苦

曹山人昌先

曹生菰蘆人鬚作蝟毛磔孝友自天就俠游聊寄跡脾

耽一世間降心見超識玄依子雲閣相卜湯源宅鐵網
沈珊瑚冥搜十年得

徐太學益孫

徐生貌溫如骨節不茅靡興詞雖沃若所造有根抵拂
衰平原門掩關驟騎里不為造物弄翛然事名理最哉
出世資毋輕慕才鬼

瞿太學汝稷

瞿生狀眇小氣雄三軍帥有志必自酬無鋒可令避合

掌西竺言興文遂餘事禪那有四病宗門無一字却問
阿難陀恐為博聞累

顏太史紹芳

女家不乏材顏生尤翹楚一賦迴帝顏羣妹讓眉嫵視
草緩銅龍橫經高白虎歸卧崑山陽夜光未輕吐時俗
易為工遜志在千古

朱王孫器封

王族饒天藻舊條困宗正子厚舞象年奕奕著才行太

息自試表含軫黃初令不睹曹子桓覬握真宰柄感此
有盡年劇稱文章盛

黃先輩廷綬

昔予忝晉棘所薦多名士黃生獨哀然博雅輕流輩惠
我錦繡段示我瑤華製苦心濟南室轉與時趣避為汝
一解嘲知希身轉貴

徐司理桂

司理宦不達遂作身後計嘔心出奇語意表見新致擺

脫塵中好雕鏤千古詣放情山水間虛舟了無繫晚合
未為遲逼人良可畏

王山人伯綢

王生托清狂貧不解工俗對客無寒暄七筋恣所欲及
乎命筆時紛紛墜珠玉秀色若可餐清音宛相屬忌者
攻其瑕雖瑕意亦足

王茂才衡

太原人中龍有子汗必血跣跋執苑場歛爾電同掣雋

聲亦縻至雅非衷所屑物表托金蘭塵中瑩冰雪置余
父子間孤蓬亦成節

汪太學道貫

仲淹司馬弟友于一何篤不作阿奴攻但經平子目心
期偏韋布酒語易肝腹折節西京言翩翩標二陸遂令
猷中植蘼蕪亦芬馥

華太學善繼

孟達才故饒結思在幽沈江左有新契中原非故欽澹

爾秋山色冷然流水音有弟能挫名轉跡入青林未却
方中軌焉知塵外心

張府幕九二

吾愛張中丞頡頏有難弟窺豹昭蔚文食牛吐生氣人
傳火攻橫不曉壁聯貴彩筆生縱橫青山晚憔悴躑躅
手板間猶歌蜀道易

梅秀才鼎祚

梅生抱超識雅復與才會上下千載間有造無不詣
媿

娜出餘態泓渟饒深致三十而逢掖同學多已貴長卿
寧當過過乃揚得意

吳文學稼澄

中丞昔談藝磊落在嘉靖季子甫離髻豹文已彪炳寧
唯代為箕其力乃超乘突過元和表窮探杜陵境游汝
父子間令人淚潛迸

八哀篇

八哀者吾郡八人也皆長於吾皆屈年而與吾

善初以不盡同調故畧之今先後逝矣當時亦
不覺有異屈指眼底漸鮮其倫不勝山陽酒壚
之感因次第咏之共八篇

陸徵士治

叔平少俠游秉志乃自純丹青雖餘事亦足走世人種
菊支硎傍不與俗客親挾余兩洞庭一一貌其真墓草
漸已宿其跡猶若新

彭徵士年

孔嘉麗文辭耿介獨天賦脫屣公車門掩鼻平津府與
余雖晚遇濶達成爾汝酒德時溫然令人感叔度每愧
墓中言未足昭千古

文學正嘉

休承名家後無所不具體既衍子墨流復工丹青理晚
節始挂冠餘映被桑梓客攜問竒酒門多乞言軌八十
而委化翕然稱趾美

陳方伯塗

子兼性坦陀友余實忘年豈乏一世用沈冥丈酒間上
書謝不任歸耕太湖田右伯亦已尊家具尚蕭然至今
綽楔表蛟龍鬱相纏

陸尚寶師道

陸公昔射策天子異其對世路方易工悠然成孤退折
節酬古歡暢情在游藝既成一家言聊滋暮年味鳳德
匪遽衰鴻心終何異

黃山人姬水

淳父負竒癖形骸更土木傷時伯鸞噫感遇嗣宗哭嘔
心一錦囊瑰麗時自足霏霏吐屑金宛宛成葉玉豈不
悟千秋眼底怨局促

顧山人聖之

季狂為諸生避仇夜中走自詫儻頗雄不操吳音久頗
鮮鱗甲腹僅餘雌黃口大厯元和間縱橫無不有歸骨
闕天長遺編知在否

錢布衣穀

叔寶事丹青往往得其意雖游文翁門厥襦繇沈氏藏
書盈萬卷一一手銓次伏枕歸嬰兒母亦造物忘生亦
無異人死還知汝異

余自解鄖節歸耕無事屈指貴遊申文外之好者
得十人次第詠之

袁太常洪愈

抑之司徒裔秉操更清絕當其謝九卿依然卧寒雪坦
陀若可親磊砢竟難悅逃名雅非意名至亦不屑事事

皆愧君難從世人說

劉大司馬光濟

伊昔歌鹿年公兄我如弟
談蕩寬酒德參差偕宦軌
北風吹轉蓬升沈自茲始
何言伯同命乃繇巨源啓
竊窺上臣心非繇植桃李

陸廷尉光祖

廷尉負雄辨袞袞不可竭
乘時握銓衡所登必耆喆
駘辭平津門栖遲步兵轍
篇章亦流暢要非中所悅
竊慕

西去津將無東海筏

胡中丞執禮

中丞夙精悍斤斤握銓柄未底不惑年賜履徧吳境精
心搜伏匿用重抑貪橫何來蠶絲毀遂諧與人詠一疏
表遺直庶幾松柏性

趙少宰賢

昔余客武昌詣臺受束約夫君實同好居體意相托天
然珪璋器何必問雕琢乘時佐銓府和光聊畫諾循吏

乃其餘映照亦不薄

徐中丞學謨

中丞雅自負珠玉生唾咳出牧抗悍王黔黎有深愛開
府襄漢濱與余實為代上相匪自今夙昔蒙眄睐推轂
故亦公登樞寧無待

劉廷尉一儒

劉君瑚璉姿溫文實天至避歲時自遠履榮恒若晚於
物不取羸苦縣有深契論交何必數一面亦自慰致語

何必煩默默兩相貴

顧廉憲章志

勝流奚必遠居然在親故孝友出名家之子饒遠度托
隱不違俗禦華時抑素天意篤象賢翱翔巨雲路物情
漸厲集巖穴安得固

李叅政頤

頽仰天地間有才不易真李侯治吳興捍闔迺如神秋
霜有時抑春雨靡不伸酒語時啓予衰魄為之振安能

托宇下朝夕庇斯人

郭中丞思極

郭公交若淺三吳自深惠精心拊黔首眦眼攝墨吏昔
者攬轡餘今茲杖鉞地欲發未發辰千人萬人淚即令
負俗譏濁涇有清渭

弇州續稿卷三

欽定四庫全書

弇州續稿卷四

明 王世貞 撰

詩部

五言古詩

闕

--	--	--	--	--	--	--	--	--	--

1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100

卿勉為讓汰者亦不違鄙侯惡平陽易箒乃不私如何
鼎鉉間腹及日相排既安成功退起獄復中之天道亦
昭昭循環無已時

其三

唐虞建官百夏商始加倍周官固兼攝迺不為祿計王
畿僅千里紛紛錯采地但讀妖莽書可望亡新治為食
裁冗官省官仍省事任怨理則然曲徇反成累

其四

許由辭四岳高蹈箕山側飲水而棄瓢誰能伺其跡千
載一羊裘吾恨堪物色圖南就嘉徵通明叅祕畫自為
大藥資終招隱淪擿

其五

太公有丹書於道若卓爾剪殷首駿勛開齊垂世紀陰
謀實種種安能塗人耳信史未敢憑吾聞諸夫子變魯
標深譏觀樂示微旨却美齊桓正尊王固如此

其六

韓起執晉政下臨東諸侯所覬一玉環再請再不售辭者既引義聽者但包羞巖巖魏太子旦夕宰神州所獲一玉玦卑辭謝鍾繇丞相時晨起中郎或晏休充庭盡璆琳但領不問酬似移勃律河拱置車門頭

其七

穰侯太后弟勛賢無與倫握秉五十年山東半為秦唾手奪相印咄咄一旅人輜重東出關黃金賤於薪人生畏失職所憂豈在貧應侯功不多況乃疎間親解綬不

待晚脩然保其身

其八

翩翩原嘗輩散金買虛名獨有魏公子好義復知兵取
士識其真肝腑為之傾一戰邯鄲完再戰大梁寧五國
從若風強秦閉峭崿積弱幸以強昏主墮維城身死社
不木異代感英聲

其九

秦皇與漢武雄畧蓋一世如何求神仙畢死不能致醇

穠日濡首二八更代侍一念殺機發九有為腥穢於力
豈不饒於道轉成悖所以雪山翁先辭轉輪位

其十

商君挾強力焉能使秦王牖下亦已喻華衮徒滋謗如
何羣小謀復樹中丞相仲達策有走燕公讐言可忘人巧
一旦伸天威疇能抗萬事翻覆手雖變理非誑

其十一

戰國一子與其德幾素王仁義不獲施千載訾齊梁侃

侃程正叔矯矯朱紫陽宗室有遺恨不登中書堂造物
護其偏欲令見所長微言在竹素千秋揚耿光

其十二

孫吳工用整起翦工用強神哉淮陰侯變化乃無常舉
目盡烏合出手成龍驤百戰取中原黥彭那得方精誠
拒武涉小謬請假王高帝撫孤雛魂魄憂未央見謂高
烏盡謂可良弓藏遺恨在匈奴冒頓驕大荒

其十三

石乞相白公能使楚社傾事覆不庇身怡然九鼎烹王
邑衛漸臺父子死漢兵磔肉縣五父狗亦厭其腥淫女
徇所歡一死猶勝生不覩西市倡改服奏銀箏

其十四

漢祖提一劍西行取天下所過降名城疇非背主者兩
賢豈相阨丁公悔其捨刑賞在須臾迺復為名假不然
賣國兒項伯開茅社寧如我高皇福壽獨褒借

其十五

韓彭既已族蕭相請室歸留侯始長嘆赤松將見依受
劫建成侯於事亦已危幸辭高皇網復受呂后羈百穀
土地腥既辟復食之商山自有人四皓了不知

其十六

秦始脩封禪白骨尸撐連漢武脩封禪宇內盡駭然開
元脩封禪妖女藥其間文彩塗人目萬眸自眴眴隋帝
既平陳能為長者言虛言誣上帝薄德報名山

其十七

孝武驅三方快若風掃翳及乎遇匈奴往往不得志長
平既雄武冠軍復慄銳橫穿單于幕直奪金人祭拓地
城五原雪讐光九世是時李飛將子長所深寄天幸與
數竒片語成軒輊竟令捷伐威寥寥無可記

其十八

項羽千載雄淮陰萬人敵兵謀歸蒲山盜道推建德友
諒據上流勢壓江南圻或臣或假手或抗或相扼天顏
要有真人巧無不悉寧知嬴與趙攻瑕易為力

其十九

魏其既罷相武安客如雲獨有灌太僕捐身奉故君長
平事勢改舍旃超冠軍誰如任司直膠漆逾不分寸心
既無負薄俗亦少敦信史表其賢異乎吾所聞七尺人
自有安能老它門

其二十

漢武鞭九有所寄三腹心公孫為丞相脫粟一布衾張
湯為大夫家不滿千金弘羊為搜粟鈎較窮飛沈橫賞

五十年民力猶可任即論守與才隱然亦國琛古人不足古今人良愧今

其二十一

李廣僂降羌百戰侯不成虞詡僂降羌百口不一增所以辛酒泉終屈趙營平天子誅南越霜戈蕩烟箐疇舉螳螂臂鹵級千萬贏斗印懸肘間焉能使無腥

其二十二

淮陰獨登壇高密初杖策抵掌下關中緩頰定河北孔

明出茅廬三分已先畫人主恐不真真則魚水得人才
恐不真真則寄社稷豎儒就功名往往賤貧迫

其二十三

子孟秉精忠其功在受遺身死骨未寒五宗遂參夷林
甫易君聰九有為之隳生時享萬鍾沒不保其尸天威
在人間臣子安得私所以餘殃及賢否同一揆高皇罷
丞相赫哉千古師

其二十四

煌煌炎漢業九有將為新吏民頌功德四十三萬人蜀
叟方著書醞醕留其醇禍患將見迫倉皇成劇秦夫豈
能釣榮苟在完其身一入霸儒手名盡言亦淪

其二十五

建武薄三公尚書領西掖雖復當樞要厥佩猶銅墨久
次文無害始為二千石尾大終壓身備物仍典冊千載
同茲恨學士充內職上可蔽主權下不膺吏責却顏九
列人黯黯無顏色

其二十六

陽都當國秉五侯競驕怙是時谷司農矯矯衡言路批
鱗擊君瑕憑社憂主悟張禹舐犢翁循默滋巨蠹孔光
首鼠徒依回市炎祚天下不為劉識者了其故彼莽何
能為諫臣與兩輔

其二十七

宋弘初宦漢仕莽為并牧承鼎建武中雖壯齒亦足抗
言辭帝婚俛首甘新祿李密既陳情無何徇除目賦詩

怨積薪曾是念初服翹首坐上尊晉耶當為蜀苟竊義
孝名千秋寧無慙

其二十八

石顯攻微文忠言被巧詆如何久不敗與帝相終始惜
哉匡說詩晚節終藿靡侵盜麗丹書經術遂不齒後賢
小其規天權煽表裏九重開宸斷八柄俄在己雖復加
諸膝委之若敝屣

其二十九

安史扇餘氛河北成異域睚眦五十載國威為之屈時
維田侍中精誠貫白日手挈六州歸力收叛藩戢時宰
不覩機捐之飽狂獠布也枕戈恨悍卒寧見恤何以報
君親剗心萬事畢

其三十

翟相持短喪除服起視事皦皦劉司徒復明先王制侃
侃富韓公千載伸茲誼嵩之觸衆喙不能保其位念非
衽金革誰當使弗避亡論權君親為君者誰氏

其三十一

漢明敦友于感自東海疆唐明暱昆弟成器為子臧地
遠天性出跡擬人倫妨斷斷隱太子糾糾巢刺王既迫
螫手憂能辭喋血傷所以斗粟謠終愧鵲鴿章

其三十二

東京誇汝南北魏推弘農友于列九命祖禰盡三公名
德冠時英禮讓世所宗董卓盜天常爾朱縱窮兇賢哲
俱駢首清渭為之紅盛極必有衰世汙以已隆雖無紹

與侃寧能保豐終

其三十三

梁冀挾椒房人主在股翼一朝尸二公舉朝皆脅息八
使行按部先埋都亭輒帶劔入尚書跪領張陵叱樂安
與京兆猶能僂其客死者代相禪生者不改直寧如書
生貴橫行於八極

其三十四

和熹昔臨朝文彩冠東都立幼擅天權不救昆弟誅宣

仁善革故聖澤沛皇圖榮名伸敵國不免于孫誣追惟
正統初斃然五尺孤太后坐深宮格心但詩書九有頌
慈孝千載仰深謨

其三十五

范公悲漢亡坐卧一車廂三十六載中不笑亦不嘔聲
在咽喉間疇能閉其呻萬古宇宙間一見有心人次則
顏見遠慨然能致身寧為江陵鬼不作建康臣頓令首
陽薇奕奕神更新

其三十六

仲舉誅左鎬謀叅聞喜席其人雖可言其地終外戚何
進屠酷兒一死媒漢賊揚湯而息沸焉能令沸息新莽
盜漢炎隋堅成鼎革赫赫我皇猷萬世垂內則

其三十七

梁侯既伏法伯始亦解宦元相死制獄縉也同茲難鼎
足共承君楫口以成亂伴食猶可言竊脂良足歎方進
媾紅陽幸叨帝恩追却條厚善者九列俱流竄於世雖

已張於顏能無汗

其三十八

維漢有宣哀隆親僅王號知者猶謂私凜然太和詔竊
窺仁人志既考而復廟批鱗見臣節因心亦子道權佐
修其却陳章托媚與自詫萬古綱能無萬古笑

其三十九

永明感竒徵微言自西竺後果攝往因如環代相續楚
英慕之誅崔浩排之族姚秦熾之亡周武熄之促趣舍

卷四
同一途疇能明罪福是以有漏因智者了不錄

其四十

東都蔽閣宦儀曜盡為腥八俊復三君皦皦露其羸林
宗巧彌縫遑遑竟無成太邱為包茹嘿嘿以苟生鯨波
挾衡颺一葦安得爭唯見黃叔度鴻飛獨冥冥

其四十一

孔明討漢賊祁山凡六出威惠等春膏精誠貫秋日謳
謠道相屬身死名不沒陽都佐東主舉朝服明決如何

反掌間名身並道滅即論新城挫不掩徐塘伐成敗遂
低昂千秋令中熱

其四十二

曹氏據七州威力方蓋世雲長鼓偏師一戰挫其銳似
憶白馬圍欲徙銅駝避國賊碧眼兒竊敗乃公事昭烈
與孔明茲時誠失計三萬黃頭軍順流下白帝退可伐
賊謀進當厚師繼既蹶興憤師中原了無意竟令涪江
水釀作永安淚

其四十三

文若本名家志在匡社稷周覽六合間疇能託其跡降
心事阿瞞相與圖僂力迅掃羣雄盡彼奸愈得職九錫
從鄴來一死明夙昔寧如寄奴相憂在後石畫死猶擅
元功生不念王室

其四十四

張魯世竒襄乘險保梁州及乎降曹公五子萬戶侯全
義亦盜雄所事無恩讐昨土享真王晚節更優游梁州

無礎盡河南但鋤耨是時二邦外柱骨如山丘亂世能
庇民食報寧不優

其四十五

昔有王彥方闇然敦古誼訟者將取平望廬慙而逝淑
問既已昭弓旌遂麋至一旦讐其身儻酤以自穢始悟
矜名客良非終隱計衆惡幾於道吾聞之老氏

其四十六

文王實剪魏叔夜尸於市天子不為讐言讐迺作天子當

時侍中君銜憤栖田里新沓竟憐才終煩司徒啓惜哉
蕩陰役終乃為讐死王哀慟蓼莪獨行表君子

其四十七

晉武弛王度隋文擅天刑於德實不競乘瑕乃合并苻
秦任景畧七州差蕩平慨然念大統夫豈徒佳兵淮淝
誤一蹶中原遂土崩豎儒輕相薄志士嘆無成

其四十八

五胡肉晉室聽勒獨獰兇王族無完領萬姓一釜中斲

準小豎子而乃夷聰宗冉閔差強意羯血三臺紅伊昔
新城役阮秦快六雄天地誠不仁代報以無終

其四十九

晉昭實剪商誕也誼弗受麾下數百人一一田橫友矯
矯繼漢龍夫豈稱魏狗攸之扶宋傾迴為宇文守二李
起南北慨焉捐其首於心豈盡純於道良無疚奉璽者
何人心死亦已久

其五十

晉元起微弱夷吾為始興武德中不競因事就功名當時
時錚錚者僅一陶士行坐觀武昌變齟齬歷陽兵珍賄
傾王室睥睨折翼徵豎儒不覩事謬比於孔明所以柴
桑叟憤然振家聲

其五十一

太元抗強秦江左一安石惜哉饒遠量而乃乏遠策車
騎實堪勝用勝良未得淮淝再鼓後全秦皆喪魄胡不
遂長驅歸來偷宴息坐視慕容熾依然限南北

其五十二

伯仁負高名惟能日洪醉深源負高名老大不曉事不
用人若失用之反成累俯仰宇宙間名虛復何冀處仲
與靈寶猶能亂人世

其五十三

明德擅軒龍不及宋貴人元魏為殘忍立庶戕其親亞
子矯之謬嫡后為大嬪苟在快其私母乃垂天倫肩體
登宸極往往稱並尊並尊無乃過隆養禮亦均

其五十四

吳卒脫瘦冰功當冠國臣但求百斛酒陶然竟其身園
卒為蘄王致貨巨萬緡依然抱一甕老作灌園人始悟
范少伯得之猶未真辭越復居陶憂死復憂貧何似兩
卒賢名與利俱泯

其五十五

魯霸傾儲宮大帝為之惑及乎登見廢霸亦當大辟魏
秦傾儲宮勢已危奪嫡承乾用反削秦遂均州謫豈唯

覬覦解亦使憤惋釋始悟英雄人為舛亦不極

其五十六

營平不貪功獲伸于明主清源不貪功主驕方黷武封
拜跬步間見之弗肯取供君一念快使我萬骨腐祿兒
方開邊曷不慚入土

其五十七

元嘉脩內政江左乃宴寧淳熙急外攘庶事實勵精再
舉再辱師戎馬反縱橫拓跋威方振完顏治復平兩勁

迫自完誰能問合并少保痛朱仙太尉悔崢嶸事機苟
一失千載遂無成

其五十八

曹馬雖竊禪猶存故君禮靈寶存晉安劉宋緣之起是
以零陵王掩恨歸蒿里一念逞所私千秋成厲軌諸子
豈盡噐人人不良死不然寄奴勛夫豈阿瞞比

其五十九

彥國領元樞堅辭格外賜一賜何足言難沮格外事老

臣於舉動往往見深意鼎足共承君染指不自制椒房
與左鐙相與徼恩惠患得已不憂得之了不愧

其六十

東昏逞屠僂勛庸一朝盡赫赫蕭蘭陵雍州義師振豈
惟感家難九有同茲愠奈何吳娃戀竟媒彭城豐不聞
夏殷滅喜姐皆來嬪人綱既已乖天道良可信更讀巢
刺編令人發深恨

其六十一

武陵怙酒德法興寄腹心
湘東肆豪猜佃夫當喉襟
名輕行既劣俾制嗣君淫
倖門既四闢八座皆聳瘖
片紙夕下來晨即委刃礎
物情雖云快隱憂良亦深

其六十二

景倩實孝廉精心事苦塊
雖詳楮公譬誰能使居位
一朝遊國憂扶攜入趨衛
宋棟垂欲傾一木焉足賴
父子同所歸怡然見先帝
子野豎儒生咄咄計成敗

其六十三

彥回秉清令鬚髯盡如戟會之負挺勁長身若立壁堅
請天水社力抗山陰逼生死在須臾豈盡為名飾一念
偶已非滔天遂焉極赫赫兩師尹能無發深惜

其六十四

每讀梁史殘愀然感僧辨奸雄志逐糜肘腋遂中變焚
骨飲其灰王頌解脩怨論功不受賞竟免丹書譴良勝
伍行人終成徇知戀此身復為奢沈寃竟誰唁龔壯更
超然巴山從所願

其六十五

宋或剪諸昆建安亦就圖忠勛在宗社不獲保頭顱魏
恪猜羣叔彭城首見疎明德格乾坤未免當門鉏儲胥
既自徹羽翼孑然孤唾手授蕭郎遺藥召爾朱人事與
天心默應良不誣

其六十六

謝朓箕山節恨為子季賣出處自當心取決人聲效赫
赫司徒公誰能使之拜辭蕭初若遠仕鸞豈無害指口

但飲酒優游於禪代當時保身者名位兩不敗千載思
勝業令人有餘慨

其六十七

晉有一仁人開府羊荊州梁有一仁人車騎韋嚴侯弱
者懷其德強者伐其謀儉慈不敢先老氏羊所優竺教
橫天來舉世皆蕩流韋也守中庸不忤復不求

其六十八

昭明秉岐嶷其用稍文弱晉安一繼之靡靡成輕薄而

況於湘東豹文迺羊鞞何必侯司徒然後成危削奚侯
宇文公江陵方面縛人主執天權操念為美惡渾渾西
京詞已矣不可作

其六十九

爾朱起秀容結俠傾魏室眾不滿萬人所至無衡敵立
空葛榮眾遠授天光策有才足為亂惜靡戡亂德賀六
曹瞞亞黑獺仲謀匹混合由真運鼎峙乃材力咄咄廣
武嘆令人歌阮籍

其七十

魏氏起索頭統萬駕勃勃太武及文成兵氛猶未歇高
祖力用夏三靈為之悅人文外以炳天綱內多缺易世
曾幾何奄然遂改物禮著忠信薄斯言吾敢蔑

其七十一

高氏恣淫昏為周剪明月炯炯血一泓剗之終不滅英
辟風後人吠堯亦昭雪易世有狂童捨旃尋故轍親賢
若齊王睚眦見屠裂為隋抑何厚為周抑何蔑掩卷感

廢興令人思明哲

其七十二

周武平晉陽六合在掌指如何後嗣昏廟社同齊址誠
臣抱訔慮直哉烏丸軌徐方接陳壤守經以俟死衛瓘
終不免伯陽竟遠徙為身計若疎為君斯可矣

其七十三

唐公固隋臣宇文啓茅土阿廢隄商辛毒乃痛海宇何
必禪讓跡無害干戈取為德固未深功亦肩周武反顧

靡愧心高光絕千古若夫黃虞上赫赫我皇祖

其七十四

唐高甘聚麀妖盟竊皇綱淫羶易廟社三靈為慘傷維
城拉然崩蹠血染天潢莽卓為一人寸斬不足償惜哉
無絕母完歸於上陽當時極兵威萬憤亦少揚養虎自
遺蠶遺恨在英王

其七十五

梁公古明德昭代實無倫瀕死不改節所涖惠必臻婉

諫復皇儲密引皆俊民五龍既夾日萬古歸其仁危哉
再相時齒暮宦亦陳萬一先朝露此志竟何伸阿姨自
有子不作女主臣

其七十六

少陵實沈雄太白擅豪華當其盤礴時口吻皆烟霞一
字翰墨林千秋歸大家生平宦不達晚節各天涯奉謹
竄夜郎乞食困浣花而我獨何幸獲保青門瓜

其七十七

文饒一材臣所至樹風誼會昌式微代皇紐將解墜立
決萬里策手挈三鎮地寵多器不任為汰復為伎垂老
涉鯨波白骨無所寄但稱裴司徒不及李太尉

其七十八

唐德初告衰宇宙正佳兵前有郭汾陽百折必東傾萬
死不易心後有李西平萬古立人極豈惟宗社楨彼燧
亦何論為罪亦已盈惜哉臨淮謬遺恨在齊名

其七十九

裴公大將材不解深州圍韓公大將材不戢好水師決
勝或先登寧如一偏裨及乎坐廟堂天子所著龜片語
轉乾坤匹身係安危信哉尼父言大受難小知

其八十

唐室將賈亂高明俱倦勤軒龍不安位鶴馭將帝賓兩
武稱賢助二李亦純臣云陛下家事何必問外人愛州
與荊州不憚批逆鱗幸以首領完沈淪竟終身

其八十一

興慶帝父尊重華天下養如何猜疑際天倫遂板蕩抱
景等幽囚跬步同流放生時億兆主彌留向誰傍北雞
一司晨豺虎成茲謗

其八十二

牛李相樹敵進退為是非刺刺唇吻間人主至宵衣如
何洛蜀黨賢者亦為之渙羣表大易不比有明規矛盾
起方寸所讀何書詩竊窺五鬼章至今令人疑

其八十三

陽公為諫議四載閱其口一作驚人鳴出為道州守魚
羹及稻糜與衆均所受催科自註考能令督郵走兄弟
凡三人相與日飲酒醉即共衾宿不娶竟無後釣奇性
理僻於道能知否

其八十四

順宗長諒陰任文遂竊柄生終被竄僂死猶蒙佞倖及
觀所釐革往往多敝政頗收遺老還力與中貴競柳呂
一自沒欲速成蹭蹬不覩快心人時有膏肓病

其八十五

自古負心人毋與朱三伍狙詐曹瞞流寧允亞石虎狂
鋒既犯蹕王公盡礎芥沙陀首弄兵乘時竊邊土破巢
稍臣分劫揆仍允虜力屈聊避尊夫豈崇故主竊陋司
馬公帝紀安足數

其八十六

天厭五季腥時復一掃之存者旦暮人焉能辨華夷馮
公豈不偉於節安所施信心白及間榮貴保期願千秋

蒙垢汙所救亦不訾二石一海鷗古稱圖澄師儒者所
不道西竺將取斯

其八十七

有宋躬柔德臺諫執天衡與帝爭是非物論時見憑念
無九苞彩爪距若蒼鷹檜曹肉餒之搏擊中所憎士氣
一為奪千秋猶不勝側耳平津館嘯嚅承明廷咬咬雙
鷓鴣豸角何崢嶸竄頭復搖尾寧不愧其名

其八十八

藝祖惇友于淳熙不良弟空宮閔丘嫂陰及戕二嗣奚
必柱斧聲然後乃成弒普也社稷臣驅除每先意其悞
不在今悞在書金櫃何物一老嫗亂經狗所庇每讀梁
孝書竊賢竇詹事

其八十九

宣和負與國復滄海上盟一念不勝貪宇宙遂佳兵朱
仙十三詔竟分南北形奕世言恢復聊爾美其名開禧
大辱國符離亦無成孱然史越王持重見譏評貴壽復

世延母乃當帝情

其九十

伯紀與德遠忠志貫金石量隘而才疎焉能剪強敵忠
簡差練事其氣已蕭索等彼王與謝雍容叅揆席矯首
眺大河蒼蒼七陵色安得劉寄奴純心為宗國

其九十一

強敵震四垂天地為之裂鐵騎過獨松宋膽恚以奪信
公仗孤忠羣僚乃烏合弱卵壓泰山猶能整其轍天運

久已去人事那得說掩卷惜公才世儒但稱節

其九十二

贊皇謝膺試魯公戒求辟於中豈泊然大小猶有擇奈
何策華腴而奪隱士職前轍既已迷後軌踐其跡是巧
靡不師疇能已日革浮雲翳其眸欲辨人間色何如皓
魄澄羣暄自辟易

其九十三

天厭一世人英雄生馬足兵及周八荒所至皆魚肉中

原冠帶地幾希付樵牧時維耶律公捐身不違俗宛轉
中所嗜從容解其毒遂令子遺民生齒成代續萬古祠
禹功從配當不慝

其九十四

邊馬躡中原遂掃東南陸天地盡為元生人安敢違倫
物俱漸盡存者僅一絲許生當色辰強起修飾之雖復
風俗頽猶守六經遺奈何拘方士斷斷生呖斯不聞夫
子言吾欲居九夷

其九十五

已延善居功師出能以律中廢同汾陽晚榮等高密廉
公當鼎沸一出秦隴謚正色抑降臣改顏崇儒術莫謂
秦無人江左乃無匹天意惜未純阿桑時問出

其九十六

高皇提一劍力扶乾坤翳聖武振八荒榮名邁五帝時
維中山王獨任心腑寄坐連百萬兵手挈中原地才宏
識更遠功大心轉細兩都對珥貂茅土垂世世

其九十七

開平卒於師曹衛亦早逝所以保令名爵賞亦延世宋
公拓中原功多罪亦細潁公闢西南未種織介戾苟免
鍾室誅難辭杜郵賜為燕剪名將焉知非天意

其九十八

韓公佐開國雅若何在漢尊當百僚師戚則東第冠貴
富既已極君恩未終渙胡陳小豎子何迺與其亂投繯
應星隕誰能明非叛但讀虞部章竊深投杼嘆


其九十九

吾憐革除際諸賢何不辰齊黃既首禍希直亦謀臣白
及亘天來誰能保生存桓桓鐵尚書血戰挫燕人捐脰
不肯回一死識其真魏公椒房舊大義迺滅親下見武
寧王慨焉不辱身

其一百

己巳邊馬狂上皇困魚服舉朝一于公嶷然回地軸天
子憂萬年鶴駕將改卜代言當上賞孤卿盡公祿于獨

再堅辭於心了無恧彼權借文伎誰知非實錄



弇州續稿卷四